



UNIVERSITÄTS-
BIBLIOTHEK
PADERBORN

**R. P. Valerii Reginaldi Bvrgvndi Seqvani E Societ: Iesv,
Praxis Fori Poenitentialis**

Ad Directionem Confessarii, In Vsv Sacri sui muneris ...

Regnault, Valère <1543-1623>

Mogvntiæ, 1617

Cap. 1. De definitione Iuramenti,

[urn:nbn:de:hbz:466:1-78477](https://nbn-resolving.org/urn:nbn:de:hbz:466:1-78477)

LIBER TERTIVS. ET TOTIVS OPERIS DECIMVS-OCTAVVS.

DE SPECIALI RATIONE IUDICANDI DE PECCATIS, respectu habito ad secundum Decalogi præceptum.

P RÆ F A T I O.

SECVNDVM Decalogi præceptum traditur Exodi 20. cap. his verbis: Non assumes nomen Dei tui in vanum: nec enim infonem habebit Dominus eum, qui assumpserit nomen Dei sui frustra. Item D. aut. 5. his non multum diuersis. Non vsurpabis nomen Dei tui frustra: quia non erit impunitus qui super re vana nomen eius assumpserit. Illi autem, sicut & primo præcepto, additur poenæ comminatio, propter propensum hominum ad illius transgressionem ex frequentia iurandi: vt D. Thomas notat prima secunda quæst. 100. art. 7. ad 4. Etenim poenæ sunt præcipue necessariae, propter eos qui proni sunt ad malum. Itaque ad frænandam humanam licentiam: non modo in futuro, sed etiam in præsentî sæculo, talis transgressio punitur à Deo; prout patet ex cap. 17. Ezechielis, verbis illis. Vixit ego, quoniam iuramentum quod spreuit, & fedus quod præuaricatus est, ponam in caput eius.

Quod vero nobis per idipsum commendatur est externus Dei cultus, consistens in verbis: sicut per primum præceptum commendatur cultus internus, & per tertium, cultus externus consistens in opere. Ad hoc nimirum vt colamus Deum animo, verbo, & opere. Et quamuis negandum non sit principaliter per illud prohiberi iuramenta perperam facta: nihilominus tamen Diuo Antonino in 1. par. tit. 14. cap. 4. §. 3. absoluted assentiri possumus, dicenti prohibitam esse in illo omnem inordinatam diuini nominis vsurpationem; cum conueniat omni tali, frustra, seu sine debito fine esse: aut rem esse vanam. Quapropter ad tradendam rationem iudicandi de peccatis in ordine ad idem præceptum, per explicationem eorum quæ ad ipsum spectant; dicendum nobis est non tantum de iuramento, & periurio, sed etiam, tum de affine eis adiuratione, tum de laude Dei, tum demum de voto, vti que transgressio: addito tractatu de Religiosorum statu.

TRACTATVS I.

De iuramento & periurio.

DE iuramento & periurio agitur in iure Canonico, 22. quæstione 1. 2. 4. & 5. & in Decretalibus ac Clement. tit. De iure iurando. Tractant vero eandem materiam cum D. Thoma interpres ipsius 2. quæst. 89. & 98. Summa interpretis ipsius 2. quæst. 89. & 98. Summa interpretis ipsius 2. quæst. 89. & 98. Summus lib. 8. De iustitia & iure quæst. 1. & 2. Couar. ad cap. Quamuis pactum De pactis in 6. Nauar. in Enchir. cap. 12. & Summularii in verbo Iuramentum, & in verbo Periurium. quibus accesserunt aliquot ex nostris: Azor prima parte Moral. institut. lib. 11. Gregor. à Valentia secunda secunda disput. 6. quæst. 7. Suarez De religione tomo 2. tract. 5. Leon. Lessius De iustitia & iure lib. 2. cap. 42. & Thomas Sanchez in opere Moral. lib. 3. per totum. De iuramento autem hæc occurrunt explananda. Primum, ipsius definitio. Secundum, condiciones quas requirit vt sit licitum. Tertium, multiplex diuisio illius. Quartum, difficultates quædam speciales de iuramento promissorio. Periurium vero considerandum est primo, generaliter. Secundo, specialiter. periurium asseritorium. Tertio, periurium promissorium. Quibus de iuramento comminatorio, ac de iudiciali addenda sunt aliqua particularia.

CAPVT I.

De definitione iuramenti.

SUMMARIVM.

- 1 Iuramentum vnde dictum, & qua sit illius definitio.
- 2 Formule verborum, de quibus an sint iuramenta, iudicandum est ex intentione eas proferentis.
- 3 Finis cuius gratia est iuramentum.
- 4 Inuocatio tacita diuini nominis sufficere potest ad iuramentum.
- 5 Perfecto, sane, vere, in veritate, & similia, non sunt de se iuramenta.
- 6 Nec item, si dicatur: In fide mea, aut, in fide boni viri.
- 7 Quando sit iuramentum dicere Per meam fidem.
- 8 Quando sit, dicere In mea conscientia.
- 9 Quando non sit dicere Per Deum.
- 10 Ad iuramentum non est necessarius tactus Euangeliorum, aut alterius rei sacre, etsi vtilis sit.

IVRAMENTVM seu iusiurandum, ex eo nomen habet quod sit quasi pro iure introductum: vt id quod sub inuocatione diuini testimonii dicitur, pro vero habeatur: prout recte declarat D. Thomas in cit. quæst. 89. art. 1. & post ipsum Sotus initio citata quæst. 1. quibus consentit Couar. ad memoratum cap. Quamuis pactum, in initio, numero 2. qui in precedenti nu. 1. notat, definitiones varias excogitatas esse ad iuramenti naturam aperiendam: vtrū loco omnium potest esse illa, quæ Nauar. attingit in Enchir. c. 12. n. 1. vt sit affirmatio vel negatio, attestatio Dei, tanquam veritatis infallibilis, expresse vel tacite firmata.

Dicitur autem affirmatio vel negatio: quia non nunquam affirmando, non nunquam vero negando, Deus ad-

NUM. I.

ducitur in testem. Dicitur (attestatione Dei) *est*, inuocatione Dei in testem, iuxta illud posterioris ad Corin. c. 2. Testem inuoco Deum in animam meam. Nam nisi Deus in testimonium inuocetur, iuramentum non est.

2. Vnde qui dicunt, Deus scit, Testis est mihi Deus, Coram Deo loquor, aliiq; huiusmodi formulis vtuntur, non sunt dicendi iurare: si quidem talia proferuntur non inuocatiue, sed enunciativè: seu volentes non quidem inuocato Deo in testem confirmare prolata se: sed ea ad diuinum iudicium remittere, vbi omnia plana sunt & aperta. Alioqui si verba eiusmodi inuocatiue dicantur ad confirmandum id quod asseritur, non est dubium quin contineant iuramentum: vt recte notarunt Caiet. 2. 2. *quæst.* 89. *art.* 1. ad 3. Sotus in *cit. quæst.* 1. *art.* 1. *pag.* ante finem: Nauar. in memorato *cap.* 12. *num.* 2. & alij, quorum Sanchez meminit in opere *Moral.* lib. 3. c. 2. n. 20. Ratioque est, quia in hac materia magis attendenda est intentio, quam verba: quæ licet in foro exteriori ponderentur: in conscientia tamen, & coram Deo, non sunt iuramentum nisi in intentio ad iurandum, vt notatum est à Gratiano 22. q. 5. cap. Qui peierare. Et confirmatur, cum ex c. 1. De iureiur. in 6. cum per illud, quod in cap. Humanæ aures eadem *quæst.* quinta dicitur in hac sententiam: quod non debeat intentio verbis deseruire sed verba intentioni: tum demum hac ratione, quia non potest quis vere, formaliter, & iurare, sicut nec formaliter Deum inuocare: aut vllam aliam actionem vere moralem facere, sine intentione expressa, vel tacita eam faciendi: cum actio facta omnino præter intentionem, non libera sed naturalis censetur.

3. Ad dicitur in definitione (tanquam veritatis infallibilis) vt indicetur iuramenti finis, qui est veritatis confirmatio, ex Apostolo ad Hebr. 6. vers. 16. & ex cap. Et si Christus, De iureiurando. Etenim plerumq; ea quæ ab homine proponuntur talia sunt, vt ipse nequeat veritatem eorum ostendere ratione: & cum per peccatum originale in malum illud incurrerit, vt ei simpliciter dicenti non facile credatur: quia ex Plal. 115. Omnis homo mendax (intellige natura sua) fit, vt si is velit haberi sibi fidem, debeat recurrere ad auctoritatem & testimonium alicuius, qui omnino verax sit, vt est solus Deus: vel ad testimonium eorum, in quibus diuina maiestas & infallibilis veritas ipsius reuelat: cuiusmodi censentur fides Catholica, & Evangelia, in quibus talis veritas continetur: itemque Beati regnantes in celo, qui eidem veritati adhaeserunt, & eam aliis prædicauerunt, Vide D. Thomam in memorata *quæst.* 89. *art.* 6.

4. Postremo loco in definitione ponitur, *expresse vel tacite firmata*, ad significandum inuocationem diuinam finis in testimonium, posse fieri non modo expresse & aperte, vt cum dicitur Testem inuoco Deum, Testor Deum: verum etiã tacite, vt cum dicitur Viuit Deus, seu Per Deum. Nec enim necesse est vt verbum, *iuro*, apponatur: vt post Panorm. ad *cit.* cap. Et si Christus, notat Sylu. in verb. Iuramentum 1. q. 1. in principio. Imo (quid quid aliqui contradixerint) Couar. ad *cap.* Quamuis pactum 1. par. in initio n. 4. existimat cum multis aliis (quos ipse commemorat, & quibus assentitur Azor in 1. par. *Moral. instr.* lib. 11. c. 2. q. 4.) verba non esse necessaria ad iuramentum: ita vt absq; vlla verborum prolata, Deus nonnunquam censetur in testem adduci: vt cum mutus (qui potest iurando obligare se alteri) aut etiam alius rogatus aut iustus tangere manu crucem aut Euangeliorum volumen, tangit intendens annuensq; se iurare. Quæ vero in contrarium obijci possunt idem Couar. in *seq. n.* 5. sufficenter soluit, & post eum Azor loc. *cit.* Videri quoq; potest Couar. in tract. De relig. lib. 1. c. 11. Et aduertendum est quod etsi respectu hominum consummatio iuramenti requirat signum externum: nihilominus in ordine ad Deum, posse absque eo in mente consummari, saltem promissorium, perinde ac votum: prout bene notat Suarez lib. 1. *cap.* 1. *num.* 4. citati tractatus.

5. Cæterum eidem definitioni congruenter, multa pro praxi statui possunt. Ac 1. non esse iuramentum, si dicatur profecto, sane, certe, vere, aliudve simile: necitem si dicatur In veritate ita est: quandoquidem per id nec tacite, nec expresse Deus in testem aduocatur: cum etsi Deus veritas sit, non omnis tamen veritas est Deus: sed illa dun-

taxat quæ infallibilis est. Quæ doctrina est Caietani ad citatum *art.* 6. & Syluestri in verbo Iuramentum primo, q. 3. & communis.

Quantum concedendum est oppositum accidere, si is qui tali formula verborum vtitur, intendat iurare, Deumque ipsum (qui est summa veritas) asseueratione ea in testem adducere: ex Caiet. ibidem in fine. Cui adde obiter eandem, tum alias asseuerandi formulas rationem habere iuramenti apud homines eos, apud quos in more positum est, ut illæ accipiantur tanquam vim habentes iusiurandi: quod Azor etiam notat in *præced. quæst.* 1. itemq; citatis Suarezio & Greg. à Valep. Thomas Sanchez in opere *moral.* lib. 3. *cap.* 2. *num.* 1. Ex quo in fine sequentis *num.* 7. adde, eum qui talia verba æroneè putat esse verum iuramentum, & proferat ea cum intentione iurandi, etiam detecto errore, manere obligatum coram Deo; quia in illa intentione, non addito aliquo excludente necessaria ad iuramentum, censetur virtute inclusisse ea ipsa necessaria. Nec obstat, formulam verborum qua vtitur non indicare iuramentum: quoniam verba impertinentia sunt, in ordine ad obligationem iuramenti coram Deo.

Statui secundo potest, non esse iuramentum, si dicatur, In fide mea: quia sub ea forma, Deus nec tacite nec expresse in testem vocatur, vt habet Sotus in 8. De iust. & iure *quæst.* 1. *art.* 1. paulo post 4. conclus. Et confirmatur: quia talia verba efficiunt solummodo hunc sensum. Ita id faciam, ac si ego fidelis in promissis, vt loco *cit.* bene exponit Caiet. Idemque est si dicatur, In fide ingenij viri, vel In bona fide, secundum eisdem auctores. Imo (addit Sotus) idem forsitan est, si dicatur In fide boni Christiani, aut In fide boni Religiosi: quia id videtur esse affirmationem vel negationem suam non aliter confirmare, quam per fidem humanam, quam bonus Christianus vel Religiosus in dictis & promissis suis, adhibere seruareque debet: secus vero foret, si diceretur Per fidem Christiani: quia tunc Catholica fides in testimonium citaretur, ex Couar. loco *cit.* § 2. *num.* 2.

Statui tertio potest, quod docent Caiet. & Couar. in iisdem locis, & Nauar. in *Enchir.* c. 12. *nu.* 2. versu 4. non esse iuramentum si quis dicat Per meam fidem, nisi habeat intentionem expressam iurandi (quæ si adest iuratur, siue hoc, siue aliis iam dictis, aut post dicendis modis, eadem intentio exprimitur, vt in eisdem auctoribus assentit) aut aliquid addat, quod indicet fidem diuinam: vt dicendo Per fidem qua credo in Deum: nisi enim tales circumstantiæ adfint, fides tantum humana censetur in testem adduci: adeo vt dicens Per meam fidem, non sit iudicandus ea verborum formula Deum in testem adducere, sed tantummodo se ipsum, quantum est fide dignus. Istud pluribus tractat Suarez in eodem lib. 1. *cap.* 13. *num.* 9. & aliquot sequentibus.

Statui quarto potest, quod non sit pſtandus iurare qui dixerit In mea conscientia ita est: quod loco *cit.* expressit Sotus: rationem addens; quia eorum verborum sensus est; Id aio, quod sentio. Quod vero ipse addit iuramentum esse, si quis dicat, Per meam conscientiam ita est: non videtur simpliciter verum: sicut nec si diceret Per meam vitam, aut Per meam animam: nam, vt habet Nauar. in *Enchir.* c. 12. *nu.* 4. versu 3. non adducitur Deus in testem cum iuratur per creaturam absq; intentione expressa vel tacita adducendi eam per respectum ad Deum in testem infallibilem veritatis, sed solummodo in testem: quod verba non proferantur sic, sed ex animo; atque testem talem, qualis ipsa est in se absolute. Quamquam non videtur negandum quin sit iuramentum execratorium, si ex intentione dicentis, verba eiusmodi sint execratoria: nempe dicta hoc sensu: Ita agat Deus cum mea conscientia, aut cum mea vita, vel anima mea, vt dignum est, si mentior aut fallo. Cuiusmodi execratio rationem habet iuramenti: quia non fit per creaturam quomodocumque, sed prout in ea relucet diuina iustitia. Ad istud faciunt que in *cod.* *cap.* *num.* 21. & aliquot sequentibus habet Suarez.

Statui quinto potest cum Angelo verbo *Per iurium* in principio, dicentes Per Deum cōmuni modo loquendi non iurare, cum non habeant intentionem iurandi, neq; id au-

dientes illud accipiant pro iuramento, tanquam minime prolatum inuocatiue, prout ad ipsum iuramentum exigitur: neque obstat quod proferant expressa verba iurandi: quia iuramentum nequit vere esse nullum interueniente intentione iurandi, vt ostensum est num. 2. in expositione secundæ particule definitionis.

10. Statui potest ad extremum (vt pleraque alia omittam quæ commodius in sequentibus annotabuntur, & de quibus videri potest Sanchez in cit. cap. 2. ad rationem iuramenti minime pertinere, vt fiat tactis Euangelis, aliisve diuinis Scripturis, aut aliare sacra. Nam tradita iuramenti definitio attendit ad illius intrinsecam rationem spectare tantum, quod Deus in testem vocetur. Eam esse communem sententiam ex Alciato vocetur Couarr. ad cap. Quamuis pactum par. 1. §. 1. num. 1. addit nihilominus esse nonnunquam tutius ad hominum terrorem, vt cum tali solemnitate iuramentum interponatur: quia si cautiùs ipsum seruabitur: eo præsertim nomine, quod tunc grauius periurium committatur, ex D. Thoma 2. 2. quæst. 98. art. 3. ad 2. quam si absque solemnitate præstitum esset iuramentum; tum propter scandalum, tum propter maiorem deliberationem.

CAPVT II.

De conditionibus quas iuramentum requirit vt sit licitum.

SUMMARIA.

- 11 Refutatio erroris, quod sit illicitum iurare.
- 12 Quo sensu iuramentum prohibetur Matth. 5.
- 13 Aliquando illicitum est non iurare.
- 14 Qui non admittantur ad iuramentum.
- 15 Tres conditiones requiritæ, vt iuramentum sit licitum.
- 16 Quando ea deficiant.
- 17 Casus in quibus non licet clericis iurare.
- 18 Quarta conditio vt iuramentum fiat per verum Deum.
- 19 Iuramentum per falsos Deos factum, est peccatum grauisimum.
- 20 Quod tamen non obstat quin urgenti necessitate possit iuramentum exigi ab infidelibus.
- 21 Obiectio in contrarium cum solutione.
- 22 Quomodo sit aut non sit licitum iurare per creaturam.
- 23 Quatuor modi quibus potest quis iurare per creaturam.
- 24 Duo modi quibus iurans per creaturam censetur per Deum iurare.

11. **N**VNQVAM licitum esse iurare, error est quem merito damnari in bulla Martini quinti (quæ habetur in fine Concilij Constantiensis) patet: quia Deus ipse iurat, iuxta illud Psal. 109. Iurauit Dominus & non penitebit eum: & illud Luc. 2. Iurandum quod iurauit ad Abraham patrem nostrum. Iurat etiam Sancti iuxta illud Psal. 118. Iurauit & statui custodire iudicia iustitiæ tuæ. Quod & confirmatur exemplis, quæ in veteri quidem Testamento frequentia sunt, vt de Abrahamo Genes. 21. sub finem: de Iacob Genes. 31. vers. 5. De Moysè Exodi c. 2. versu 21. & de Dauidè 2. Regum c. 3. vers. 35. & c. 19. vers. 7. In nouo Testamento autem de D. Paulo cum ait ad Rom. 1. Testis est mihi Deus] & in posteriori ad Corin. c. 1. Testem inuoco Deum] & ad Galat. 1. Ecce coram Deo, quia non mentior.] Patet quoque idem ex eo quod iurare seruatis conditionibus iis, de quibus hic dicere institutum, actus sit virtutis; nempe religionis, vt post D. Thomam 2. 2. quæst. 89. art. 4. annotant Sotus lib. 8. De iustit. & iure quæst. 1. art. 4. Nauar. in Enchir. c. 12. n. 2. Gregor. à Valent. 2. 2. disp. 6. quæst. 7. puncto 3. aliiue recentiores, & inter eos late Suarez De religione tract. 5. lib. 1. c. 4.

Ad quod confirmandum induci potest illud Deut. 6. Dominum Deum tuum timebis, & illi soli seruias, ac per nomen illius iurabis. Et hæc ratio addi potest: quia is qui iurat, Deum aduocat tanquam testem infallibilem; vnde iurando ei honorem impendit, ipso minime indignum: vt pote qui continet tacitam fidei professionem, quod ipse sit prima veritas, neque fallere aut falli possit: adeo vt merito dictum sit in Psal. 62. Laudabuntur omnes qui iurant in eo, id est, per eum: Nec vero vllatenus dicendum esse, quod in noua lege iuramentum sit illicitum: ostenditur ex

instituto in cap. Etsi Christus, De iureiurando: latiusque tractant Gregorius à Valenti loco cit. & Suarez in præced. cap. 2. ac ante eos Couarr. ad cap. Quamuis pactum, 1. par. §. 6. v. num. 2. varias adfert interpretationes verborum Domini apud D. Matthæum cap. 5. quæ in contrarium citari posse videntur. Dico autem vobis non iurare omnino, neque per cælum, neque per terram: &c.] ac paulo post: Sit autem sermo vester est, est, non, non: quod autem his abundantius est, à malo est.

Sufficit autem nobis illa, quam recentioribus probari video: vt illis verbis Dominus corrigat errores Pharisæorum, existimantium iuramentum per creaturas non obligare; prout patet ex verbis eiusdem Domini Matth. 23. Væ vobis duces cæcorum, qui dicitis. Quicumque iurauerit per templum, nihil est. Ad eum igitur reprehendendum ac reprobandum, docet non iurare omnino, hoc est, non iurare quodcumque iuramentum, prout habet D. Iacobus in sua epist. cap. 5. seu non modo per Deum, sed nec per creaturam iurare, nisi forte necessitas, quæ non habet legem, compellat: vt aliquando contingere potest ob imbecillitatem humanam: quando quidem homines per originale peccatum eius conditionis effecti sunt, vt in rebus occultis, fides eis non facile adhibeatur: adeo vt ad persuasionem illarum opus sit iuramento, seu inuocatione infallibilis veritatis. Id quod notatur à D. Thoma 2. 2. quæst. 89. art. 2. habetur ex cap. Etsi Christus, De iureiurando.

Cui interpretationi auer, quod iuramentum est de genere bonorum sit, vt patet ex antedictis; non est tamen de genere eorum quæ sunt frequentanda sicut ieiunium, oratio, & elemosyna: sed eorum quæ solum posita necessitate, in vtu esse debent: sicut sumere medicamentum, occidere hominem, capere alienum &c. Ratio autem est, quia ad reuerentiam Deo debitam pertinet, vt is (cum tantus sit) non adducatur in testem nisi necessitas exigat, idque in negotio non leui momenti: in quo cum non possumus aliter fidem facere, recurramus, sicut in aliis angustiis, ad opem diuinam. Cum autem secus fieri, id est, iurari temere, soleat in cõmuni sermone: id corrigendo Dominus ipse subiungit, Sit autem sermo vester est, est, non, non; commendans nobis simplicitatem in loquendo: vt cum res ita habet prout proponitur, simpliciter dicatur ita est: cum vero secus se habet, simpliciter negetur; quia quod abundantius est, à malo est, id est, à diabolo, vt ibidem interpretantur D. Chrysostomus & Theophylactus (quos loco citato refert Couarr.) & sequitur magister meus P. Ioan. Maldonatus in suis commentariis: vt sensus sit, consuetudinem in communi sermone sine necessitate temereque iurandi, cum simplex affirmatio vel negatio sufficit, non à Deo, sed à diabolo introductam esse: vt pote quæ ordinatur in perniciem animæ, & in detrimentum rerum ad corpus necessarium, iuxta illud Ecclesiastici 23. Vir multum iurans adimplebitur iniquitate, & non discedet à domo illius plaga.] Id quod à Concionatoribus inculcandum est, & viribus omnibus incumbendum exterminationi illius prauæ consuetudinis; prout suo tempore incubuit D. Chrysost. homilia 4. & sex sequentibus ad populum Antiochenum.

Imo vero per præceptum affirmatiuum contentum in negatio quod hic datur de non iurando in vanum; tenemur aliquando iurare, seruatis interea conditionibus necessariis: ita vt nolle id facere peccatum sit. Id quod contingit, vt notat Couarr. ad cap. Quamuis pactum, par. 1. §. 6. nu. 3. cum potestas publica à ciue iuramentum exigit ad detegenda, coercendaque crimina, quæ vergunt in reipub. perniciem. Item cum quis requisitus est iurare ad confirmationem testimonij, quod tenetur dicere ad liberandum innocentem à damno, aut pro magno reipub. commodo; sicut colligitur ex cap. Intimaui. De testibus, & ex iis quæ traduntur à D. Thoma 2. 2. quæst. 70. art. 1.

Non est tamen negandum, merito fieri (de quo Sotus 8. De iust. & iure quæst. 1. art. vlt.) vt aliqui ad iuramentum non admittantur. Ac primo pueri quidem non admittuntur ad iuramentum ante annum 14. ex cap. Paruuli & seq. 22. quæst. 5. etiam si tanquam habentes vltim rationis, perinde peccent male iurando, ac maiores natu, ex c. 1.

12.

13.

14.